

# PRIMERA CARTA DEL APOSTOL SAN PABLO A LOS TESALONICENSES

---

**1** <sup>1</sup>Wejr Pabluqui, Silvanužtan, Timoteožtan, tii cartal cjiiržcuča ančhuc Tesalónica wajtchiz žoñinacžquin. Nii wajtquiz icliz žoñinacčhucča ančhucqui. Nižaza Yooz Ejpžtan Yooz Majchtan tsjii kuzzizčhucča. Jalla nižtiquiztan učhum Yooz Ejpžtan, nižaza učhum Jesucristo Jilirižtan ančhucaquiz yanapt'ila. Nižaza zuma cuntintu kuzziz walikaj kamkatla.

## JESUCRISTUŽQUIN ANCHA KUZZIZ ŽOÑINACA

<sup>2</sup>Wejrnacqui tjapa ančhucaž cjen tirapan Yoozquin sparaquič cjiwčha. Yoozquin mayizican ančhucaltajapa wiltan wiltan mayizuča. <sup>3</sup>Učhum Yooz Ejpžquin mayizican, cjuñznuča ančhucaž zuma Yooztajapa trabajtiquiztan. Ančhucqui Jesucristužquin kuzziz cjen Yooztajapa tjapa kuztan trabajčha. Nižaza anchucqui zuma munaziñi kuzziz cjen, Yoozquin zuma sirwiča. Nižaza Jesucristo Jilirž tjonž tjuñi tjewzcan, zuma tjurt'iñi kuzzizčhucča. Jalla nuž ančhucaquin cjuñču Yooz Ejpžquin sparaquič cjiwčha. <sup>4</sup>Jilanaca, cullaquinaca, Yooziž pectanaca, Yoozqui ančhuc illziča.

Jalla nuž zizcu, wejrnacqui Yoozquin sparaquič cjiwčha. <sup>5</sup>Wejrnacqui ančhucaquin tjonžcu, liwriiñi Yooz taku paljaychinča. Anača žoñž taku alajakaz paljaytaqui; Yooz takupanča paljaytaqui. Yooz Espiritu Santuž aztan paljaychinča. Nižaza werar Yooz tawquiz tjapa kuz tjurt'ican, Yooz puntu paljaychinča. Nižaza ančhucatan kamcan jaknužt wejrnacqui kamchinžlaja, jalla nii zuma zizza ančhucqui.

<sup>6</sup>Ančhuczti wejrnaca kamaña irata jalla nižta kamñi žoñi cjissinčhucča. Nižaza Jesucristo Jilirž kamañ irata kamñi žoñi cjissinčhucča. Nižaza ančhucqui wejrnacaž paljayta Yooz taku catoktiquiztan, ancha sufrichinčhucča. Walja sufris cjenami, Espiritu Santuqui ančhucaquiz cuntintu cjiskatchičha. Nižaza sufrisqui ančhucaquiz wejnacaquiz iratazakaz watchičha. <sup>7</sup>Jalla nižtiquiztan ančhuca puntuquiztan zuma quintu ulanchičha tjapa criichi žoñinacžquin, Macedonia yokquin žejlñi criichi žoñinacžquinami nižaza Acaya yokquin žejlñi criichi žoñinacžquinami. <sup>8</sup>Ančhucaž cjen Yooz takuqui tjapa kjutñi paljaytača. Anača Macedonia yokquizkaz nižaza Acaya yokquizkaz paljaytaqui.

Tjapa kjutñi paljaytača. Nižaza jaknužt ančhucqui Yoozquin kuzziz cjissinčhucžlaja, jalla nii quintu tjapa žoñinacaqui zizza. Jaziqui wejrnacqui ančhuc puntuquiztan anaž iya quint'asača. <sup>9</sup>Ninacapacha wejtnacaquiz quint'iñitača jaknužt ančhucqui wejtnacaž paljayta Yooz taku catokchinčhuctažlaja, jalla nii. Ančhucqui žoñiž paata yooznacquiztan zarakchinčhucča, werar žejtñi Yooz sirwizjapa. <sup>10</sup>Nižaza ančhucqui Yooz Majch arajpachquiztan tjonz tjuñi tjewža. Yoozqui niž Majch ticziquiztan jacatatskatchiča. Jalla nii Jesusaqui učhum casticunacquiztan liwriichiča. Jalla nuž quint'iñitača ančuca puntuquiztan.

**PABLUŽ YOOZ TAKU  
PALJAYÑI OJKTA**

**2** <sup>1</sup>Jilanaca, cullaquinaca, jalla tuž zizza. Wejrnacqui ana ina ančucaquiz tjonzinča. <sup>2</sup>Ima ančucaquiz tjoncan Filipos wajtquiz sufrichinča, nižaza wejrqui iñartatača. Jalla nuž sufritaž cjenami Yoozqui wejrnaca yanapchiča, ana ekan tjturt'iñi kuzziz Yooz zuma liwriiñi taku paljayajo. Jalla nuž paljaychinča, žoñinacaž wejtnacatan quintra ancha aptazanami. <sup>3</sup>Nižaza wejtnaca paljaytaqui anatača chekachuc, nižaza anatača ana zuma kuzquiztan, nižaza anatača ančhuc incallzjapa. <sup>4</sup>Yooz Ejpqui wejrnaca tantiichiča, walikazza. Jalla nižtiquiztan Yoozqui wejtnacaquiz niž zuma taku cumpjiichiča. Jalla nii Yooz takupan paljayuča wejrnacqui. Anal paljayuča žoñinacž kuz wali cjeyajo kasi. Antiz Yooz kuz wali cjeyajo paljayuča. Yoozqui učhumnaca kuz zizza, nižaza tantiicha ultimu. <sup>5</sup>Ančhucqui tuž zizza,

wejrnacqui anača zuma takunaca paljaychinča wejtnaca partiquiz luzkatzjapa, nižaza persunalta čhjulum tanzjapa. Weraral chiyuča. Yoozazakaz wejtnaca puntuquiztanaqui nii zizza. <sup>6</sup>Cristuqui wejrnac apostolunaca cuchanžquichiča. Jalla nižtiquiztan wejrnacqui ančucaquiz mantiñi cjitasača. Pero ančhuc ana mantichinča, nižaza wejtnaca honora wayt'ižiñi anal pecasuča, ančhucmi yekjanacami. <sup>7</sup>Antiz wejrnacqui ančhuc zuma cwtican željchinča, jaknužt tsjaa maatak žonqui persun wawa cwtassaja, jalla nuž. <sup>8</sup>Nižaza ančhuc ancha k'ayachtuča. Jalla nižtiquiztan ančucaquiz Yooz zuma liwriiñi taku paljaychinča. Nižaza ančhucaltajapa čhjulu paazmi listuča wejrnacqui, ticz cjenami. Jalla nuž ančhuc pecñi cjissiñča. <sup>9</sup>Jilanaca, cullaquinaca, weriž langža cjuñzna. Majiñami weenami langzinča ochañcama, wejtnaca persun wira mantinsjapa, nižaza ančhucalta ana ch'ama cjeyajo. Jalla nuž kamchinča liwriiñi Yooz taku paljaycan.

<sup>10</sup>Nižaza ančhucatan zuma kamchinča. Yooz kuzcama kamchinča. Nižaza anaž jecmi wejtnaca quintra čhjul ujmi tjeežñi atasača. Jalla nii ančhucqui zumpacha zizza. Yooz zakaz nii zizza. <sup>11</sup>Ančhucmi zakaz zizza, jaknužt tsjii ejpqui niž persun maati cwtassaja, jalla nižtapacha wejrnacqui ančhuc cwtassinča. Ančhuc kuzzinča, nižaza p'ekinchaychinča, nižaza chiižinchinča, ančhuc zuma kamajo. <sup>12</sup>Jaknužt Yoozquin criichi žoñinacaqui zuma kamz waquizičhaja, jalla nuž ančhucqui zuma kamz waquiziča. Yoozqui nižquin criichinaca utchiča nižtan chica mantizjapa, nižaza nižtan chica honorchiz cjisjapa. Jalla nižtiquiztan zuma kamz waquiziča.

<sup>13</sup> Ančhucqui weriž paljayta Yooz taku nonzinčhucčha, nižaza catokchinčhucčha, tuž cjan: “Tii takučha ultim werar Yooz takuqui. Anačha žoñž takukaz”. Jalla nuž catoktiquiztan tii zuma Yooz takuqui ančhuca kuznaca tsjan tsjan zuma cjiskatčha. Jalla nižtiquiztan tirapan Yoozquin sparaquiči cjiwčha. <sup>14</sup> Jilanaca, culluquinaca, ančhucqui walja sufriñchucčha ančhuca persun wajtchiz žoñinacaž ana wali paañiž cjen. Jalla niža irata sufrichičha Judea yokquiz žejlñi criichinacami. Werar Yooz icliz žoñinacaž cjen niža sufrichičha. Nižaza persun wajtchiz žoñinacaž ana wali paañiž cjen, sufrichičha. Tsjiikaz ančhucaquizimi ninacžquizimi watchičha. <sup>15</sup> Nii Judea yokquiz žejlñi judionacaqui Jesús Jiliri conchičha. Nižaza niž tuqui Yooz taku paljayñi žoñinaca conchičha. Nižaza wejrnacqui chjatkatchičha. Nižaza jalla nuž paažcu tjapa žoñinacž quintraž paačha. Jalla nuž paatiquiztan Yoozqui ninacž quintra žawjčha. <sup>16</sup> Wejrnacqui liwriiñi Yooz taku paljayz pecatučha ana judío žoñinacžquiz, ninaca liwriita cjejajo. Nii anawali paañi žoñinacazti wejrnac atajchičha. Jalla nižtiquiztan ninacaqui juc'anti persun ujž yapkatčha. Jalla nuž ujnaca yapkattiquiztan Yoozqui wiñayaž wali casticu tjonkataquičha ninacžquiz.

### PABLUQUI WILTA TJONZ PECČHA

<sup>17</sup> Jilanaca, cullaquinaca, tsjii kjažtapacha ančhucaquiztan ojkchinčha. Jalla nekztan wejrnacqui ančhuc anchal cjuñžnučha. Jalla nižtiquiztan ančhuc ancha cherpapal pecaytučha. <sup>18</sup> Nižaza ančhucaquin irantisquizpan pecaytučha. Wejrnacaž ojkz pecan, Satanasacqui wejrnac atajchičha. Wejrqui wiltan wiltan ojkz

cjichintačha. Jalla nuž ojkz pectaz cjen, Satanasacqui wejr atajchičha.

<sup>19</sup> Jilanaca, cullaquinaca, Jesucristuqui tjonaquičha. Nekztan niž yujcquiziqui ančhucaž cjen cuntintul cjeečha.

Ančhucaž cjen wejrnacqui tjewznačha honora tanzjapa. Ančhucaž Yooz taku criichiž cjen, juc'antiž chipznačha wejrnacqui. <sup>20</sup> Chekapan ančhucqui wejtnacaquiz cuntintuž cjiskatčha, nižaza wejrnac honorchiz cjiskatčha.

**3** <sup>1</sup> Jalla nuž ančhucaquiztan ojkžcu, ancha ančhuc cjuñchinčha.

Jalla nekztan Timoteo učum jila cuhanžquichinčha, ančhuc cherni.

Parti wejrnaczi Atenas wajtquiz ecliz cjichinčha. <sup>2</sup> Timoteuqui Yoozquin sirwiñičha, Cristuž liwriiž puntu

paljaycan. Jalla nižtiquiztan Timoteuqui cuhanžquichinčha ančhuc juc'anti Yoozquin tjurt'iñi kuzziz cjejajo.

Nižaza ančhucaquiz zumpacha Yoozquin criizjapa p'ekinchayajo,

cuhanžquichinčha. <sup>3</sup> Nižaza Timoteuqui ančhucaquin tjonžquichičha, ančhuca

kuz ana turwayta cjisjapa pruebanacaž watchiž cjenami. Ančhucpacha zizza

criichinacaqui pruebanacaquiztan sufristančha, jalla nii. <sup>4</sup> Tuquiqui

ančhucatan žejlcan, wejrnacqui nuž mazinchinčha, učum criichinacžquiz

pruebanacaž tjonaquičha, cjan.

Jalla nižtapacha weriž chiita taku

cumplissičha. <sup>5</sup> Jalla nuž ančhucaquiz pruebanacaž watan wejrqui quintu ana

zizzi atchinčha. Jalla nižtiquiztan ana iya awantichinčha. Nekztan Timoteo

cuhanžquichinčha, ančhuca Yoozquin criichi kuz, jaknužt kamčhaja, jalla nii

zizjapa. Pinsichinčha, “Satanás diablut ančhuc tsjii kjutñi cutiskatžcaa”, cjan

pinsichinčha. Ančhuc cutiskattasaž niiqui, wejtnaca obra inakaz cjitasachha.

<sup>6</sup> Tsjii kjaž majquiztan Timoteuqui quejpžquichičha Tesalónica

wajtquiztan. Nižaza zuma quintunaca zjičchičha tuž cjican: “Nii Tesalónica wajtchiz criichi žoñinacaqui ancha Yoozquin kuzzizpančha, nižaza zumaž munazičha. Nižaza ninacami učumnacž zumapanž cjuñkalčha. Nižaza ninacaqui učumnacatan ancha zalz pecčha, jaknužt učumqui ninacžtan ancha zalz pecčhaja, jalla nižtazakazza ninacaqui”.

Jalla nuž cjican zuma quintunaca zjičchičha ančhucaquiztan. <sup>7</sup>Jilanaca, cullaquinaca, wejrnac zakaz ancha sufrisnacami pruebanacami watučha. Jalla nuž cjenami nii ančhuca puntu zuma quint'itiquiztan wejtnaca kuzqui zuma cuntintutachha. Ančhucaž Yoozquin tjapa kuzziz cjen, ancha cuntintutčha. <sup>8</sup>Jaziqui zizzinčha, ančhucqui Yoozquin tjurt'iñi kuzzizpančha. Jalla nuž zizcu wejrnacqui tsjii ew žeti tanžtažokazza. <sup>9</sup>Ančhucaž cjen Yoozquin ancha sparaquiz cjiwčha. Nižaza ančhucaž cjen Yooz yujcquiz ancha cuntintuž wejrnacqui. <sup>10</sup>Nižaza majiñami weenami Yoozquin mayizučha ančhucatan wejtnacatan persunpacha wilta zalzjapa. Nekztan ančhucaquiz tjaažnasačha juc'ant zumpacha Yoozquin kuzziz cjisjapa. Ančhuca kamaña čhjulut pjaltichaja, jalla nii tjaažnasačha.

<sup>11</sup>Jaziqui učum Yooz Ejpžtan nižaza Jesucristo Jiliržtan, jalla ninacaqui wejrnaca irpijaal cjiwčha ančhucaquiz wilta zalzjapa. <sup>12</sup>Nižaza Jesucristo Jiliriqui ančhucaquiz juc'anti zuma munaziñi kuzziz cjiskatla, porapatmi nižaza tjapa žoñinacžquizimi. Jaknužt wejrnac ančhucatan zuma munazitučhaja, jalla nižta irata.

<sup>13</sup>Jalla nuž zuma kamtiquiztan Yoozqui ančhuca kuz juc'ant tjurt'iñi cjiskataquičha. Jalla nižtiquiztan

ančhuca kuzqui Yoozquinpanž cjequičha, Yooz Ejpž yujcquiziqui ana čhjul ujhiz cjisjapa. Jalla nuž cjequičha učum Jesucristo Jilirž tjonž tjuñquiziqui. Jalla niiqui tjonaquičha niiž partir žoñinacžtanpacha.

#### LUCUTJIÑI ZUMA KAMZ WAQUIZIČHA

**4** <sup>1</sup>Jilanaca, cullaquinaca, jaknužt zuma kamz waquizičhaja Yooz cuntintu cjisjapa, jalla nuž tjaažinchinčha. Nii zuma kamañ jaru kamiñčucčha. Nižaza juc'anti niicama kamaquičha. Jalla nijapa ančhucaquiz chiižinučha, nižaza rocučha, Jesucristo Jilirž cuntiquiztan.

<sup>2</sup>Tuquiqui ančhucatan žejlcan, wejrnacqui Jesucristo Jilirž cuntiquiztan tjaažinchinčha. Jalla nii tjaažintanaca ančhucqui zizza.

<sup>3</sup>Yooztajapapan zuma kamajo, jalla nižtaž kamñiž pecčha Yoozqui. Jalla nuž kamcan, anačha adulteriu paazqui, nižaza anačha tsjii luctakaqui yekja maatakžquiz pinzizqui. <sup>4</sup>Nižaza Yooztajapa kamcan, tjapa criichi žoñiqui ziz waquizičha, jaknužt criichinacaqui persun tjunatan zalz waquizičhaja, nižaza zalžcu jaknužt zumapanž kamz waquizičhaja, jalla nii. <sup>5</sup>Ana Yoozta kamñi žoñinacazti persun tjunatan ana zuma kamčha. Yekja maatakanacžquizpankaz

pinsican kamñičha. Jalla nižta irata ančhucqui anaž kamz waquizičha.

<sup>6</sup>Anaž jec criichimi yekja jilž maataka kjutñi pinziz waquizičha. Nižaza yekja jilž maatakatan adulteriu paaz anaž waquizičha. Nižta paaquiz niiqui, jilž quintra uj paačha. Jalla nuž ana zuma kamñinaca casticaquičha

Yoozqui. Jalla nuž tuquiqui wejrnacqui ančhucaquiz chiižinchinčha. <sup>7</sup>Yoozqui učumnaca kjawzičha niiž partiquiz

cjisjapa, nižaza zuma kamajo, ana yekja kjutni cjecjeyajo. <sup>8</sup>Jalla nii tjaajintaqui anaž žoňž kuzquiztan tjonča, Yooz kuzquiztanpan tjonchiča. Jalla nižtiquiztan jequit nii tjaajinta taku ana pajčhaja, niiqui Yooz ana pajča. Yoozqui ančhuca kuzquiz niž Espíritu Santo luzkatchičha ančhuc zuma kamajo.

<sup>9</sup>Tsjiilla wejr cjiwča, criichi jilanacžtan zuma munaziz puntuquiztan. Jalla niža puntuquiztan Yoozqui ančhucaquiz tjaajinchiča porapat zuma munazizjapa. Jalla nižtiquiztan wejrnacqui ančhucaquiz nii puntuquiztan ana ancha cjiirača. <sup>10</sup>Jalla nuž zuma munaziñchucča tjapa Macedonia yokquiz kamni criichinacžtan. Jilanaca, cullaquinaca, wejrnacqui ančhuc chiižinuča, ančhuca kuz juc'anti munaziñi cjisla, jalla nuž cjiwča. <sup>11</sup>Nižaza ančhucqui zuma llan kuzziz cjee. Yekja žoňž asuntuquiz anapan mitiz waquiziča. Pero persun kamañ wirquiz kuz tjaasa. Nižaza persun kjaržtan langznaquiča. Tuquiqui nuž ančhucaquiz mantichinča. <sup>12</sup>Jalla nuž ančhuc zuma langztiquiztan ana criichi žoñinacaqui ančhuc rispitaquiča. Nižaza ančhucaquizpacha ana čjulumi pjaltaquiča.

#### JESUCRISTUQUI WILTA TJONAQUIČHA

<sup>13</sup>Jilanaca, cullaquinaca, wejrnacqui ančhucaquiz ticzi žoñinacž puntuquiztan tjaajinz pecučha, ana ancha llaquita cjejajo. Ana jacatatz wira tjewžni žoñinacaqui llaquiziča tsjii ticzi cjenauqui. Ana niža cjejajo, ančhucaquiz tjaajinz pecučha. <sup>14</sup>Učhumqui criichinčhumča, Jesucristuqui ticziquiztan jacatatchičha, jalla nii. Nižaza criichinčhumča,

Yoozqui Jesucristužquin criichi ticzinaca jacatatskataquiča. Nižaza ninaca Jesucristužtan chica tjonkatta cjequiča.

<sup>15</sup>Nižaza tii Jesucristo Jiliriž tjaajinta taku ančhucaquiz tjaachinča. Jesucristo Jiliriž tjonz tjuñquiziqui primiraqui ticzi criichi jilanacaqui nižtan zalaquiča. Nekztan tii yokquiz žejtchi criichinacaqui tsewcchuc chjitzazakaz cjequiča, Jesucristužtan zalzjapa. <sup>16</sup>Učhum Jesucristo Jiliripacha tsewc arajpachquiztan chjiwžcaquiča. Nii orapacha criichinaca kjawznaquiča mantiñi joržtan. Nižaza tsjii pajk jilir arc anjilaqui kjawznaquiča. Nižaza Yooz trompeta tjawunznaquiča. Jalla nekztan Cristužquin ticzi criichinacaqui jacatatskattaž cjequiča. <sup>17</sup>Tii muntuquiz žejtchi criichinacž tuqui jacatatskattaž cjequiča. Nii ticzi criichinacaž jacatatskattiquiztan parti criichinacaqui ninacžtan juntupacha chjitzazakaz cjequiča. Nekztan tsewcchuc tsjir taypiz Jesucristo Jiliržtan zalaquiča. Jalla nekztanaqui tjapa criichinacaqui tirapanž Jesucristo Jiliržtan wiñaya kamaquiča. <sup>18</sup>Jalla nii zizcu, nii takunacžtan porapat kuzasnaquiča.

**5** <sup>1</sup>Jilanaca, cullaquinaca, čjulorat Jesucristuqui quejpžcačhaja, nižaza ima niž quejpžcan čjulut watačhaja, jalla nii pizc puntuquiztan ančhucaquiz ana anchal cjiiruča. <sup>2</sup>Ančhucqui nii pizc puntu zumpacha zizza, Jesucristo Jiliriui tiripintitž tjonžcaquiča. Žoñinacaž ana čjulu pinsita, tiripintit tsjii tjañiqui luzza. Jalla nižtaž cjequiča Jesucristo Jiliriž tjonzqui. <sup>3</sup>Ana criichi žoñinacaž “Walikal kamok” cjenpan, nižaza cuntintu želan, tiripintit Yoozqui ninacžquiz tsucnaquiča casticž

tjuñžtan. Jaknužut tsjaa ic maatak žon tiripintit laaquičhaja majtsjapa, jalla nižtaž tiripintit ana criichi žoñinacaqui castictapanž cjequičha. Nii casticz tjuñquiztan ana atipa ataquičha. <sup>4</sup>Jilanaca, cullaquinaca, ana criichinacaqui zumchiquiz kamčha. Ančhuczi anaž zumchiquiz kamčha. Jalla nižtiquiztan Jesucristuž tjonzqui anaž ančhuc tsucnaquičha tsjii tjañžtakaz. <sup>5</sup>Tjapa ančhucqui Yooz zuma kjañ jiczquiz kamiñchucčha, anaž zumchiquiz kamiñchucčha. <sup>6</sup>Jalla nižtiquiztan Jesucristo Jiliriz tjonz tjuñi ančhucqui listu tjaczi zuma kuzziz tjewznaquičha. Zuma kamcan, listupachaž tjewžna, ana tjajtažokaz. Ana criichi žoñinacaqui ana juyzu paačha Jesucristo tjonz tjuñi puntuquiztan. Ana nižta cjee. Jesucristuž tjonz tjuñi zuma listuž tjewžna, tjaji watsi kuzziztakaz. Nižaza zuma kamzjapa persun wira cwtasa. <sup>7</sup>Weenqui žoñinacaqui panž tjajčha. Nižaza weenqui žoñinacaqui licčha, panž licčha. Jalla nuž paacan, ana iya čhjulumi pinsičha. Jalla nižtačha ana criichi žoñinacaqui. Jesucristuž tjonz puntuquiztan ana juyzu paačha. <sup>8</sup>Ančhucqui ana nižta cjee. Učhumnacaqui Yooz kjan jiczquiz kamiñchumčha. Jalla nižtiquiztan persun kuz zuma Yooz jiczquiz kamzjapa, cwtasa. Yoozquin tjapa kuztan cjee, Yooz ančhuc Satanasquiztan tsijtsinajo. Nižaza criichi žoñinacžtan zuma munaziza. Nižaza ančhucqui liwriiz tjuñi zuma listuž tjewžnaquičha. Jalla nuž kaman armichiztakaz cjequičha. Jalla nižtiquiztan Satanasqui ančhuc ana atipasačha. <sup>9</sup>Yoozqui učhumnaca ana utchičha casticta cjisjapa. Pero Yoozqui učhumnaca utchičha, zuma liwriita wira tanzjapa Jesucristo

Jilirž cjenacui. <sup>10</sup>Jesucristuqui učhum laycu ticzičha, žejtchi criichinacami ticzi criichinacami nižtan chica cuntintu kamajo. <sup>11</sup>Jalla nižtiquiztan porapat p'ekinchayrasaquičha, tjurt'iñi kuzziz cjisjapa. Nižaza porapat yanaparasauquičha, zuma kamañchiz kamzjapa. Anziqui ančhucqui porapat yanapassa. Jalla nuž tirapan porapat yanaparasauquičha.

#### PABLUŽ CHIIŽINTA TAKUNACA

<sup>12</sup>Jilanaca, cullaquinaca, ančhucatan Yooz taku paljayñi žoñinaca žejlčha. Jalla ninacžquiz rispitaquičha. Nižaza ančhuca irpiñnacžquiz rispitaquičha. Nižaza ančhucaquiz zuma tawkžtan chiižini žoñinacžquiz rispitaquičha. Yooz Jiliriz uchtaž cjen nii žoñinacž mantuquiz žejlčha ančhucqui. Jalla ninacžquiz rispitačo rocučha. <sup>13</sup>Ančhucqui tjapa nii žoñinacami ancha rispitaquičha ninacaž Yooztajapa langztiquiztan. Ninacžtan zuma munazaquičha. Nižaza ančhucqui porapat zumapanž kamaquičha.

<sup>14</sup>Jilanaca, cullaquinaca, ančhucaquiz chiižinžcučha, jayrazñi criichinacžquiz zumpacha trabajzjapa chiižinajo, nižaza ururñi kuzziz criichinaca tjup kuzziz cjeajo, nižaza llajllasñi kuzziz criichinaca tjurt'iñi kuzziz cjiskatajo. Nižaza tjapa criichinacžtanami pasinziz kuzziz cjee. <sup>15</sup>Tsjii žoñiqui ana wali paatan tsjiizuñacui ana nižta ayni tjepunz waquizičha. Antiz zuma munaziz waquizičha porapatmi nižaza tjapa žoñinacžtanami.

<sup>16</sup>Čhjulu watanami cuntintuž cjee. <sup>17</sup>Yoozquin tirapanž mayiza. <sup>18</sup>Čhjulu watanami Yoozquin sparaquičha cjee. Jalla nuž ančhucalta Yooz munčha ančhucqui Jesucristužquin kuz tjaachiž cjen.

<sup>19</sup>Espíritu Santuž obra tjeeznan, ana nii ataja. <sup>20</sup>Nižaza Yooz taku paljayñi žoñinaca ana iñara. <sup>21</sup>Antiz nii paljayñi žoñinacž taku zumpacha tantiya, werar Yooz taku ana werar Yooz taku, jalla nii. Zuma Yooz takuž cjenauqui, kuzquiz nii taku catokaquičha. <sup>22</sup>Ultimu ana werar Yooz taku cjequizñi, nii taku ana catokaquičha. Čhjul ujmi nižaza anawalinacami anapan paa.

<sup>23</sup>Učhum Yoozza cuntintu kuzziz cjiskatñiqui. Jalla nii učhum Yooz ančucaquiz niž kuzcamapankaj kamkatla. Nižaza Yoozqui ančuca kuzmi, animumi, janchi curpumi

zumapaj cwitila ana tsjii uj cjeajo, Jesucristo Jiliriž tjonzcama. <sup>24</sup>Yoozqui ančhuc kjawzičha niž partiquiz cjisjapa. Yoozza niž taku panž cumpliñiqui.

<sup>25</sup>Jilanaca, cullaquinaca, oracionžtan yanapžcalla.

<sup>26</sup>Tjapa criichi jilanacžquiz zuma tsaanaquičha, jaknužt ančuca tsaanz cuzturumpi žejlčhaja, jalla nuž.

<sup>27</sup>Wejrqui ančucaquiz tjiinučha, tii carta tjapa criichi jilanacžquiz liižinaquičha, jalla nuž.

<sup>28</sup>Učhum Jesucristo Jiliriqui ančucaquiz yanapt'ila. Nužukazza tii cartaqui. Amén.